

新

衡

詞

夫清商激林翠顙喧夕古月流砌涼蛩絮秋觸焉斯鳴啼其
感矣弱不好弄耽作才語索居孤諷繚以曼聲抗心松陵之
簫希風玉筍之曲獨蘭縑緒幽花渲愁絲情宵辭託騷辨之
惜焉爾其斑扇藏篋素琴不張翠竹天寒窈窕空谷碧雲日
暮嬋娟未來采靡蕪以遺誰眇江水其焉極靈和春柳鬢影
驚凋汀洲白蘋心期怨晚磨鋸結客空思五陵之游攜句問
天獨抱宣城之感矣又況薦經亂離側身無所萬烽星飛鐵
騎踏冰孤臺日斜怪鴟叫屋綠蕪臺城之路悲笳合肥之夕
酒澆趙土談兵爲之於邑筑擊燕市拔劍助其激昂於斯時
也舉目新亭江山異色言歸遼海人民已非能無銅仙鉛淚
之嗟冷月波心之感乎至若莊舄去國仲宣遠游策輦滄溟
縹馬京邑峭帆載鄂渚之雪冷筇踏金山之雲陌上草薰行

舸泛綠沙頭雁起征衫撲霜亦復酣嬉搗箏歌呼擊缶花銷
英氣酒入愁腸問明月自何年吹春水其欲皴又不特錦袍
甫召旋傷落梅之吟青瑣纔解遽下聽猿之淚者已今將埋
照簿書奔逐塵鞅婆逢春夢換扇驚心客送秋江聞歌掩泣
行且洗綺語之硯屏無絃之琴恕厥纍詞存爲少作海上水
仙操豈無鍾子期知音曲中鬱輪袍敢學王摩詰獻技乎哉
光緒二年歲在柔兆困敦律中南呂之月新蘅館主人自序
於京華客邸

蒙年弱冠喜爲側豔之詞雕刻組纈浮藻競摛而於南北二

宋未暇涉其樊籬也同里瓶隱老人

黃菊人
大令

得余詞而物色

之艷然曰若所作茂矣美矣麗以則矣其如律之弗覩何因
爲挾聲音正變之指去上浮切之響謂必含咀於宮商而後

神明於意匠勿侷矩而自放也迺益討作者之源流攷大晟

之樂律選字儷聲若合符節其尤異者夢窗之步石帶索索

無差千里之和清真四聲如一詞雖小道曷非剖析豪芒其

能洞閭閻奧乎時則名壇宿彥

黃韻甫 魏澹伯 張仲甫 方雲泉 諸老

同社才偶

楊晚嵐 高茶庵 兩君

相與規撫正聲切劑柔翰寸箋之擘暝寫晨唫一

字之安旬鍛月鍊旣鉢鏤夫肝腎遂駢羅乎篋衍庚辛之變

竄徙越郡零縑隻楮蕩爲哀燼釐定以後朋牋掇拾警枕冥

憶蓋什不得一焉嘻亦戾矣揚子云雕蟲小技壯夫不爲又

云非獨爲之華藻也又從而繡其聲悅彼其於文且鄙夷之
若斯矧箋箋之詞乎哉顧念故人宿草獨絃寡和生平譔述
委棄塵堞白駒若馳腐隨草木惟此雍門抱琴之歌秦青遏
雲之曲庶幾知音者見而甄錄焉亦古之傷心人歟嗟夫鳳
皇鳴而奇律應鴟鴞吟而芳草歇苑枯之境殊則悲愉之情
別世有希心古籟者乎空山鳴琴白雲獨往正無事慕韶韻
而棄樵唱也

光緒九年秋八月新蘅主人復序於榕城寓齋

新蘅詞卷一

錢唐張

夢江南

西湖春游曲

春游好最好段橋傍上
蒙船回油壁鬧踏青人
過畫幃香何處有紅牆

又

春游好最好裏湖隄
山市茶香鸚鵡老水邨
芹脆鯽魚肥畫榼不須提

又

春游好最好馬塍東
十畝薺花團紫蝶一鞭
榆莢送青驄不定晚來風

又

春游好最好白隄邊淺草泥鬆韉鳳婉落梅風急紙鳶顛
帶一絲牽

又

春游好最好妙蓮臺莎徑七盤緣塙上松門八寺進香來
鄉里被人猜

又

春游好最好傍湖行八字畫船齊攏岸一羣蕃馬自歸營
鎧火滿高城

浣谿紗

日日蘭橈絆客程隔江不見越山青臥聽簫管到三更
羅帳燈昏寒漸峭柁樓人語夢初醒不知是雨是潮生

換巢鸞鳳

用梅谿韻同魏丈滋伯作

無限新嬌在蘼蕪巷陌柳色河橋水窗窺倚扇月榭教吹簫
風前一捻可憐暑病餘黯然柔魂易銷屏山冷有替淚蠟花
紅照 愁悄人眇眇心事問誰明鏡當裏抱小苑樓螢畫樓
暖鳩換了斜陽芳草爭柰靈修故來遲黛眉蟬鬢青蛾老無
情天悶恹恹一任昏曉

采桑子

登樓何限關心事樹也藏鴉門也飛花可得青春駐鬢華
人間別會知多少錦帳琵琶氍毹帳風沙月子彎彎照那家

掃花游

甲寅初夏戴鹿牀侍郎方雲泉司馬魏滋伯廣文

招同章丈次白胡丈琅圃高丈伯蓀古民金君杏樓楊君晚嵐集朱氏湖莊卽席成詠

晚春夢蝶俯墜粉池臺半成秋苑翠陰漸滿襯松濤四壁畫

堂寒卷

壁上雙松侍郎墨蹟

鏡裏湖光暗把衣塵淨浣蕙風暖送幽綠

細香吹上綃扇

開徑人意遠待靜理冰弦醉拈湘管鬢絲

易短笑簪芳幘影舊紅猶染澹澹金尊要與嘯鸞共款繞花

轉祝南屏算鐘敲緩

蘇幕遮

舊藏顧西樞長亭送別畫扇效紅友體

玉驄嘶油壁待情似連環情似連環解握手臨歧分手快絮語丁寧絮語丁寧再掩離觴拈寶帶預決歸期預決歸期改夢裏尋君何處在樓外青山樓外青山外

浪淘沙

雨過散餘霞，秋滿晴沙。殘紅飄盡野塘花。潮落潮生渾不管，
催換年華。徙倚玉闌斜，目送歸鴉。高城不見況天涯。爲報
鯉魚風信惡，早閉窗紗。

又

暝色壓高檐，不卷重簾。輕羅初卸袷衣添。閒卻乘鸞團扇影，
蹴損香縑。池水浸空圓，佳約頻淹。流光都付雨廉纖。料得
橫塘秋意老，紅褪菱尖。

洞僊歌

櫻桃過了，又芭蕉新展團扇風。前眾香滿自秋帆，雨送錦字
雲稀煙外柳和夢和愁都縮。鸞箋封半篋，彩筆蟬嫣出裏。
當年喜初見，一片楚騷心。怨綠唬紅，只無奈湘皋人遠。又屈

指西風燕歸時忍重問橋東木犀庭院

柳梢青

六月十八夜湖上士女駢闐笙歌達曙蓋次日爲
祝大士誕辰也賦紀四闕作華鬢色界觀可乎

日落城闌鈿車流水爭逐芳塵酒幔全垂
笙囊暗挂何處藏春
笙歌隔岸猶聞渾不解紅愁翠輦浩蕩香天迷離色界
都是慈雲

河傳

湖面如綫月華生盡舫中流暗停綺窗六扇蟬翼輕
根根玉奴弦索聲
掠岸瓜皮催雨槳風漸上逐隊波心蕩
傍烏蓬近花叢
恩恩檀枝西復東

浪淘沙

涼月二分殘圓缺誰看繁鐙漸遠漸闌珊獨有鳳簫聲不斷
還在前山 夜久莫憑闌風露漫漫滿身香霧縠衣單料得
錦帷眠慣早可耐輕寒

菩薩蠻

水仙祠下行雲墮明朝約伴參蓮座剛道起來遲蒼龍西沒
時 香車門外等寶鏡樓中凭休掩碧紗窗白荷秋滿塘

醉江月

題元人胡褐公金陵二十四景小幅時粵賊踞金陵
陵已二載矣披圖弔古愴然於言

黯然王氣把興亡付與雲煙殘筆如此江山收眼底不問劉
藤寬窄兩姓烏衣六朝龍種霸業傷今昔板橋流水畫圖何
限蕭瑟 堪歎歷盡承平桁開朱雀又起黃巾賊燕子桃花

歌舞地粉本誰添金碧銅狄頻遷瓊枝略盡遺墨徒珍惜飄
零豪楮劫灰留弔陳迹

臺城路

丙辰秋期沈氏庾園禮星設讌感遇成歌示芷涿
竹齋昆季

洗車初斷浪浪雨西園頓驚涼早網戶傳鐙瑤籤咒月下界
雲軒空杳靈梭自巧柰織錦年華易催人老寂寞琴心夜深
除向阿蠻道 無聊憑遣酒琰鬱輪袍試按應被花惱鵲鏡
修眉蟲絲罥帶幾處紅樓人悄閒愁似草歎絡緯秋窗翠衾
誰抱起看明河玉繩天際曉

時竹齋
方悼亡

暗香

梅魂

按石帚旁譜協四聲
禁用招返銷斷等字

數聲玉笛喚嬌雲暗墮愁春無力乍引綠旛一枕寒香杳難
覓環佩歸來夜悄空望極關山行客任化作蜨夢悠揚和影
宿煙驛消息更闌寂況戍館閉門暮角淒惻故園謾憶殘
月清尊是何夕尋向朦朧紙帳渾怨卻霜天明白怕漸漸飄
散了古苔瘞碧

又

前題

楊錦雯

翠禽寂寞怕冷香未透潛催東閣喚醒綠華月底冥冥吐
僵萼前度春風易轉休更怯淒迷霜角柰徧覓鶴夢無蹤
疏影出籬落愁魄又漠漠似倩女乍離化蜨依約誤將
笑索癡絕雲痕怎棲託追念關山兩細知倦客年時飄泊
共舊恨吹幾縷暝煙澹薄

疏影

菊影

禁用冰月
鑑鏡等語

玲瓏素壁甚暗霜暈晚難綢秋色石徑疏蕪冷豔無痕迷金
檻底重覓羞他詩發同憔悴怕照覓簪頭敲側只瘦魂欲顧
誰憐賸有卷簾人惜移向青葵淨几露華更澹泠涼韻空
挹隔苑昏黃市地寒英誤了餐芳詞客微茫一幅東籬稿合
付與白描仙筆問夜闌凍螭伶俚怎抱半叢深黑

又

前題

和韻

楊錦雯

瓏鬆界壁裊碎金細縷銀粉無色豔寫霜腴認得雙身涼
魂畫裏重覓曲闌近底看搖颺料檻外西風吹側問澹痕
幻作空花可有采芳人惜不道煙霞媚晚卷簾乍映取

幽致如挹移傍尊前一片迷離絆住柴桑歸客秋屏隱約
渾疑夢怎繪到入神詩筆笑下階誤索寒香又把短簾遮
黑

楊君晚歲與余唱和最久著小蓬萊閣詞神似姜史律
呂叶治辛酉之變全家殉節遺稿散佚僅於家仲甫煙
波漁唱中檢得二闕補錄之以志黃墟之慨云

浣谿紗

池上蘋花破玉鈿庭前蕉葉拓雲箋獨無錦字到君邊
金井涼蛩疏似雨紗幮微月澹於煙更教愁裏換流年

又

金鼎香飄寶篆殘畫屏秋早薄羅寒無言獨自抱琴彈
宿醉未銷供苦茗新愁難寄託幽蘭病餘情緒太闌珊

惜紅衣

秋曉與錢珊舟三潭觀荷

小艇窈香虛亭受綠半湖空闊露洗秋高盈盈舞風葉魚天
際曉還未掩一痕殘月清絕涼卷茜雲於淩波羅競菱童
蕩檝來去花閒堆盤剝瑤雪林曦漸射翠幙漏微缺回首畫
橋煙水怕聽亂蟬聲唱約采芳重到休待雨喧時節湖中刺菱似菱而小風味最勝盪小舟者多剝賣之

鷓鴣天

銀燭秋屏淺夢中花光人影鬬玲瓏瓜犀暗怯寒泉沁荷露
微銷宿酒濃香霧斂曉雲空迢迢碧漢路難通深情若比
回塘水長定西流不復東

減蘭

效東坡鄭莊好客一首體

雜詩新體花葉親書嬌旖旎生小翫支樹底秋千臂鬢絲
羣芳慘徑鶯竄高枝春晝靜亂疊離愁飛閣參差碧瓦溝
希範與陳伯之書語爲次

又

芳華婉婉蓮步生塵羅襪刻墜下花鈿粉蝶隨香過玉肩
疏風襲袖桐葉成陰新雨後吹夢迢迢綠過門前第二橋
石八歸詞語爲次

又

雨荒荷扇絲藕登盤瓜蔓翦風簾涼收片葉吟蟬一院秋
煙深魚浦波暈衣綃人楚楚畫了雙蛾船傍西冷去蹋歌
茗堂曲語爲次

齊天樂

題張少南年丈影香詞 君懷才不遇託於緣情
綺靡以紆幽抱竹垞老人所謂空中傳恨也因本
此意寫之或無戾風人之旨乎

碧濛濛地花魂在煙情隔紗難寫借月扶嬌依鏡抱夢一縷
柔痕初化春雲豔冶漸半度屏圍半飛簾罅小院朦朧玉笙
幽抑怨遙夜 沈思年少舊事彩豪鸚鵡妬才調誰亞屑麝
成塵雕瓊作淚猶有當時羅帕吟尊倦把想側帽傳歌俊游
都謝老盡唳鴛鴦亂紅隨去馬

菩薩蠻

獸環連瑣屏山曲繡熏爐熨方花褥不解訴離情畫樓聞雁
聲 羅囊猶在篋心字餘香滅小立晚風前落梅飄滿肩

霓裳中序第一

秋夜聞歌用草窗韻

流雲卷素疊，露煙銀牀飄。暗葉愁與青蟲共結，又玉簫送涼。
紗幮通月，蓮衣墜雪，歎扇綉輕棄。瑤篴重游處，柳橋繫馬，忍
向舊鶯說。淒切笛波，嗚咽視酒淚盈衫。未減湘皋無限怨，
別袖禰芳蘭，帕解離魂，篆香心字缺。那更聽哀蟬，斷關西園
路，一簾秋瘦，草綴冷紅，蜨

又

戴鹿牀家仲甫方雲泉諸老用前韻題拙稿率賦
奉呈

湘波恨萬疊，暈入煙綃。題翠葉秋老，蘋花夢結。但硯几漱香
筍牀，彈月玲瓏散雪。賸舊時紅豆，緘篋空懷，感歌塵扇影那
共。膽孌說。幽切絮蛩哀咽，指蠟淚銀屏半滅。河橋曾記送

別酒溼貂裘，劍冷犀玦唾。壺敲又缺，忍再唱青門怨。關吟情苦，銷磨詩鬢，碧幌墮風蜨。

酹江月

葛壯節公寶刀歌 公諱雲飛，官總戎，道光辛丑，禦英夷於舟山，死之，建祠甬東，竝藏所遺寶刀二，其一曰成忠，乃殉節時手握不釋者。

連環龍雀甚斑，花剝紫英，鏃如舊，要與乾坤平。浩劫青海磨銅時候，光弼韉中，霽雲席上，血灑屠鯨手。樓蘭未斬，白虹驚看，臙斗。當日刑馬，麀軍蛟門月黑，橫梢空支守。想見戎衣斜壓處，肝膽一身能剖。碧葬遺冠金寒，佩玦兩字成忠壽。風生霜鞘，壁閒猶作騰吼。

壽樓春

錢武肅王祠下作

惟王眞英雄憶錢湖飲馬天目飛龍掌握神州十四劒光流
虹憑畫檻彎強弓訪霎時江湖爲東有勒券金書還鄉錦節
凜烈表孤忠叢祠啟苔衣封恍樓開疊雪幢倚晴空莫問
青山石鏡霓旌眞容滄海碧靈旗紅看五朝爲沙爲蟲只依
約前身蓮花半塘臨曉風

祠前蓮花最盛周晉仙詩錢王
本是英雄人白蓮花現國主身

清平樂

蘭津微溫淺拭冰荷暈雙頰斷紅潮有信生怕籠鸚低問
晚來月上蘿屏倚闌慵自調笙悔種紗窗蕉葉未涼添了秋
聲

又

風幰燭短歸路銅街遠一綫閒愁無計綰碧藕牽絲不斷

銷凝欲凍橫波挂簷忽見秋河笑鬪南唐金葉花枝奪得誰多

又

銚屑碎語酒醒人偏去絡緯桐闌聲似雨不解訴儂離緒
蟬雲暗織華絲玉釵敲斷誰知金縷疊成方勝中央四角尋思

又

雲羅碧宇水閣橫箏語畫槩穿波來又去只在藕花深處
風兒寶扇流螢中間不隔簾旌照見麝金衫子一丸涼月初生

摸魚子

家仲甫丈宴黃韻甫大令於湖上卽席賦贈並送

歸海鹽 韻甫驚才絕艷所著帝女花鴛鴦鏡桃
谿雪各種傳奇盛行於時曾在皖中李靄如方伯
幕府擘箋賭句翦燭傳歌殆無虛日今方伯溘逝
時變日亟大江南北滿目烽塵殊有蕭瑟江關之
慨矣

放輕橈曉峯橫黛晴波搖曳煙柳南湖未抵西湖好況是采
蓴時候杯在手歎曲譜輪袍空把才名繡萍游倦否慣京國
垂鞭滄江洗硯詞恨老黃九 山陽路戎幕悲涼感舊高歌
頻擊銅斗雜花滿樹羣鷺亂歸夢已濃於酒春漸瘦料送得
春歸早是人歸後離亭話久問夜火沙河殘陽漁市此去幾
回首

倦尋芳

次韻黃韻甫大令春日過竹素園

埽花鶯古扶柳亭敲銷減吟興
杏煖鶯香都付玉簫吹冷塵
幙已迷歸燕夢綠波不照驚鴻影
怕憑闌又蹉跎過了豔陽
芳景 念十載吳霜點鬢側
帽聞歌前事重省醉倚金鞭零
落翠鈿誰賸門外鶯聲如報客
亂紅堆滿來時徑莫句留漸
沙隄月明人靜

浣溪沙

五月既望驟雨初霽同人出錢塘門放櫂湖心暮
煙四斂清蟾浴波光景奇絕午夜復抵三潭攜酒
飛泳亭上荷蓋舞風綠雲千頃調冰雪藕吟賞竟
夕不止翠羽明珠之感也以雲破月來花弄影爲
韻得詞七解

飛雨纔過洗麴塵湖天如黛點魚雲殘陽一抹遠山昏
霧縠籠花人似玉風絲織簾浪生紋晚涼時節易銷魂

點絳脣

浩蕩鷗邊四山深黑明漁火水亭涼鎖一笛秋心破
棹入菰蒲撲面青蟲墮船脣坐雨絲吹過花氣冥濛簸

夜行船

忽放湖光天宇闊漸吹開萬峰雲葉萍底魚驚蘆根螢斂飛
起澹黃煙月金鏡纔圓旋又缺料姮娥替人愁絕珠淚凝
綃元霜墮杵不管玉弦彈折

柳梢青

底處蓬萊水晶宮闕異境新開珠桁鐙收珖窗幔卷清影裏
回朱顏鏡裏潛催誰挽住圓蟾去來半臂涼生百壺酒盡

何限情懷

浪淘沙

映水赤闌斜。且泊輕桡。萬荷風定斂朝霞。潭影空明亭四面，涼浸窗紗。玉宇占高華。濛濛誰誇。何如一舸共浮家。得似鴛鴦無別恨，醉月眠花。

鵲橋仙

螺尊重洗。鷗斑重炷。銀海夜深欲凍。霓裳舊曲愛新翻。也不用、桓伊三弄。鳥啼漸緊。鵲飛漸遠。遮莫曉鐘將動。人間花月縱多情，爭抵似、瓊臺一夢。

霜天曉月

明霞罩嶺。浴日光難定。聽徹天雞初報。知塵夢幾人醒。萬頃雲水淨。淩波休照影。唱到曉風殘月。今宵事怕重省。

高陽臺

月苦噉鵲堂空去燕斷腸人正悲秋素柰橫簪雲鬢無限清
愁花陰暗怯金鈴報訴心情鶚母前頭待句留江渚潮深莫
放行舟天涯豈料驚風鶴念綠楊城郭遽賦離憂鏡檻琴
臺黯然一別妝樓玉谿底事添惆悵又無端錦瑟成謳綺窗
幽涼雨瀟瀟怕上簾鉤

金縷曲

歲暮懷熊東美袁浦東美影纓世胄爲沈氏宅
相年少才偶與余締交庠園分曹賭酒翦燭傳歌
備極文謠之樂乙卯春省親袁浦旋試京兆鸞翮
偶鍛意將入貲爲郎賦此寄之

白雁橫天杪問何時梅花古驛寄書江表放溜沙河春燈後

忽又繁霜過了歎緱嶺歌塵如埽雪滿梁園愁雲緊揀寒枝
權作安巢鳥應念我鬢蓬葆長楊獻賦才名噪甚豪情哀
彈劍缺未紆懷抱滿目烽煙悲生事底用鸞坡制草且追逐
黃鵠年少殺賊如山懸金印錦衣歸博得華堂笑重話舊玉
尊倒

蝶戀花

飛蓋西園春已半笑倚花前手自調銀管杏子單衫隨意換
曲闌干外鶯聲軟蜜炬催歸芳思亂一縷行雲不到青谿
畔欲采蘼蕪難寄遠瘦金小字題團扇

臺城路

丁巳六月逗暑城西飲淥莊新月出水輒蕩小舟
薄飲荷花中裙屐交錯綠香在衣或弄水攀芳或

當風鼓曲每至蟾腳西斜棹舟而回樓高瀕湖萬
象在目呼鐙更酌吟興益豪東坡黃樓之樂不是
過也

碧荷香裏無人住銀蟾忽穿煙暝慢卷螢收篷移鷺覺漸漸
青蘋涵鏡瑠璣萬頃蕩四壁花光一簌秋影喚起瓊妃綠鬟
新洗晚妝靚樓臺臨水更好露華濃似酒扶醉猶凭翠佩
搖涼霞綃貯豔多少閒愁消領流光暗省怕幾夕西風采菱
歌靜夢墮微茫鶴笙天半冷

採芳訊

朱氏湖莊和韻甫丈

正春杪卻水館簾開評花人到紫藤香糝滿徑麝塵埽綠陰
似海閒門寂梁燕空嚙老引新愁都在鷗邊雨陂煙沼庭

樹已成抱問青奈闌干是誰凭曉影散晨星華髮又添了十年書劍河梁別夢冷南園草黯銷凝樓外垂楊自好

醉江月

送徐公可之括蒼

孔璋行矣恨題襟歲晚驅歌淒惻聽鼓衙齋無定所吹落鴻泥蹤迹倚馬雄才從龍貴肯羞執郎官戟

公可先世從龍黃隸廣州駐防

靡獵罷一時豪氣無敵長歎海嶠揚塵牙旗坐擁誰建平戎策季子貂裘風雪裏愁聽梅花羌笛高筍灘邊石帆山下此是煙波宅新詩寄我麴塵凝望江驛

霓裳中序第一

澱谿感舊用草窗韻

沙明鈿路疊拾翠游船輕似葉船尾鴉娘伴結看鬢溼杏煙

顚欺蓉月回燒盪雪有好山收拾詩篋閒情寫水樓試茗喚
起晚鶯說悲切市橋波咽恨綠浣衣香半減相逢無奈驟
別願繫龍紗忍佩魚玦榜唇瓜樣缺聽小海清歌乍闌東風
暖聚花簾底玉蘭蛻斑蟊

疏影

玻璃窗用黃菊人明府紗窗詞韻

璽瓏淨飾似翦成片玉橫嵌冰格曲牖虛櫺望裏通明窺檐
未礙蟾魄屏螺百摺遙當戶界不斷空青顏色怕日斜燕子
歸來觸響乍回雙翼曾過藏嬌翠館有人倚鏡檻纔露梅
額咫尺輕鸞不隔盈盈卻恨微波凝碧還添一桁簾如水更
莫問傳香消息奈小鬟眼遮蘭扇密記試鐙佳夕

新舊詞卷一終

新蘅詞卷二

錢唐張景祁蘇甫

清平樂

櫻桃架底珠絡牽絲細六扇文窗紗格閉一桁繡衣垂地
起來遲日初斜鬢雲猶未盤鴉貪向雕闌憑袖不知吹滿楊
花

玲瓏四犯

餞春湖上和香雪廬主人韻從石帚體

暝雨弄寒芳塵霏雪西園花事何許曲臺歌吹冷俊約金鞍
阻簾空燕來又去蹴殘紅舊香成土點屐煙隄聽箏蘭苑乘
燭夜難補濃陰暗歸高樹柰樊川怨晚吟徧愁句玉闌凝
於久墜夢無尋處傷春賸有垂楊瘦忍折盡柔條千縷判酒

醒今宵數城頭畫鼓

南鄉子

花氣蕩簾鉤涼月窺妝照畫樓曲曲屏山迷近遠
鐙收只把
猊熏一炷畱
河漢漸西流金井疏蛩聽未休
炙罷瑤笙還
擁髻含愁奈此良宵玉簫秋

翠樓吟

驟雨初過納涼池上用香雪廬主人韻

拂簾邀雲眠琴選石清陰片時難再輕雷池上轉頓收盡炎
曦林外天吳移海看萍碎跳珠荷喧歛蓋餘聲在夜來應怕
舞衣紅壤襟帶繁繞蘋風把水窗全拓銅箏同載涼花和
翠摘覺蟬鬢殘妝都改銀鐙無賴又網戶潛遮紗屏斜界
蛩藏快靽塵何處挂檐星大

長亭怨

深秋將盡旅燕先歸舊雨天涯愴焉夢別余亦飢
驅惘惘將適金閨書劒飄零黯然無緒同人皆有
餞別之作美成云南陌脂車待發東門帳飲乍闌
況味正復相似倚裝賦此情何以任

甚梁燕先辭秋社別院尋巢撇人簾下浪闊江空夢回孤枕
定應怕欲遲征櫂偏驚堦更番返便不挂蒲帆也有日離尊
同把輕捨念新詞豆蔻從此翠箋慵寫吹簫夜月早冷落
舊時荷榭料此去大好香谿且莫爲湖山牽惹況門外垂楊
嘯得紅鵲聲啞

又

疊前韻再東同人

忍拋了西泠詞社又到深秋菊開籬下電激流光一年容易
最堪怕況兼傷別雲樹外扁舟返老柳已無多怎折贈柔條
盈把休捨待攜琴問鶴不用四愁閒寫烏鵲夜冷好憑弔
故王臺榭第一是紫蟹銀鱸早夢裏煙波縈惹任晚雨篷窗
威栗城頭吹啞

角招

長洲宋浣花茂才詞筆清麗有吳中七子之風以
梅逴庵填詞圖索題爲賦此解

好亭院是誰一曲江城喚起哀怨峭寒簾未卷萬種暝愁都
付羌管松陵夢遠奈冷落小紅歌伴回首煙波故苑早千樹
雪鱗鱗向閒庭吹滿淒惋縞衣望斷青禽夜警星斗闌干
轉舊時明月換客裏銷魂春鐙零亂苔荒翠館有墮砌仙雲

飛緩裊裊餘音自轉便當日廣平心今須輓

月下笛

丹陽營中懷花雨從叔

故壘雲陽蒼煙四起驛鐙官渡城頭戍鼓壯軍聲動淮楚嚴
裝短後弓刀肅擁多少朱旗畫櫓看檄書亂下平生長笑隨
陸無武淒苦虔亭路想荻渚風餐布帆如虎河冰放溜請
纓曾謁開府誰知孤館悲吟客正連漏聽殘夜午問何日共
飲蘭陵酒一醉千古

羅敷媚

戲題陳迦陵填詞圖拓本三首

寫來滑笏生綃影不畫雲郎卻畫雲娘畢竟嬌柔易斷腸
若從水繪園中見團扇宮妝檀板新腔也合梅花百首償

又

封侯骨相何須問
酒綠燈紅兒女英雄氣盡歌筵一笑中
過江人物今安在
罨畫溪東曾住元龍
可有新詞唱懊儂

又

旗亭舊夢空畱迹
髣髴也飄蕭髮也嬌嬈八尺風髣尺八簫
豪情我亦龍川亞
一領青袍一曲紅幺腸斷松陵十四橋

虞美人

春雲不定璫璫陳壓住梅花夢
誰家羌笛起愁聲不道江關
消損庾蘭成
玉顏應妬歸鴉影綠鬢文窗冷燕支塘畔水
無香爭得一條寒碧與情長

金縷曲

吳中寄懷同社和晚嵐韻

回首鄉園別是城東秋英滿地雨霏時節小住金閨流光換
嬌聽吳嬾怨闌況候雁聲聲淒咽鶴市攜琴渾非計望湘人
彈指冰弦絕辛苦語共誰說風塵縹馬何時歇慘離懷楓
林斷夢屋梁殘月只有青山憐人意卻把愁蛾亂疊早又是
蜜梅花發書劒蕭然貂裘敝怕歸蓬還阻寒江雪空擊碎寶
刀玦

蜨戀花

江樓眺遠

幾點疏峰煙渡口寒鳥衝波蹙起鞞紋皺不見霜林濃似繡
赤闌橋外蘆花瘦客裏登樓還病酒欲雪簾櫳故國空回首
寂寞西湖春漸透梅開還等人歸否

探春

送張荔軒之松陵

竹扈魚寒荻洲雁老川途何限淒黯暝色連江殘年催雪聽
徧高城鼓紂小住香湮好又何事扁舟輕泛有人翦燭西窗
翠眉添鎖離感記我垂虹載酒看十里晚楓秋思雲澹拂
劍霜飛停桡月落倦了平生游覽細雨孤山路早夢到梅邊
香暗甚日君來煙波遙送歸纜

淒涼犯

玉簫舊約人何在芙蓉落盡秋雪錦鸞罷舞鈿車又去佩遺
珊玦蘭皋望絕更湘水湘雲萬疊記當時高梧院落蒼蘚印
鴛屨休問香谿路古柳殘鴉野塘寒葉素波未遠怎相攜
五湖歌檝夜火沙河怕歸渡流澌暗結漫句畱獨枕夢醒雁
叫月

琵琶仙

吳中歲暮感懷時官軍收復潤州

烏桕邨邊酒旗颭畫出江南風色回首野渡荒寒麋湖凍澄
碧鄉夢遠銀鱸膾玉甚長絆季鷹詞客雪浣征衣雲停舊約
難破淒寂又何用草檄從戎正書報甘泉馬蹏疾且喜隔
年春到有梅花消息歸去好紅鑪紙閣與故人共醉良夕忍
聽哀角飛霜暮愁千驛

八歸

泊舟平望追憶舊游感賦用白石韻

煙寒鷺渚鎧昏魚寨闌夜戍鼓未歇朱樓已隔蓬山遠休問
翠樽銷黯玉笙淒切尙憶垂虹秋色好倚畫檻鑪香同撥頓
忘卻客裏行舟不住喚鷓鴣誰念江鄉歲晚淹留無計一

笛離亭催別亦闌橋畔那時來路落盡蘆花楓葉縱淩波賦
就何處芳塵夢羅韞君知否片颿相送惟有天邊朦朧無恙
月

鷓鴣天

寒食修禊湖上

如水香車逐暗塵滿隄芳草門羅裙麗人已過餘花氣新柳
初齊尙酒痕 停畫槳殢清尊微茫山色擁歸雲明朝重問
西泠路細雨棠梨一斷魂

菩薩蠻

雪晴池館春波漾玉梅開過無人賞湖岸綠濛濛酒旗雙面
風 柳條鴉影集歸馬嘶金勒扶醉帽簷斜不知樓上花

摸魚兒

己未春仲與高茶庵同赴雲間舟中出茶夢庵填
詞圖索題余交茶庵已十年矣少時曾館余族姓
家衡宇相望分箋賭酒時相過從嗣後浪游吳門
聞嶠閒蹤迹疏闊逢窗翦燭不勝今昔之感爲譜
此闕以寄意

記相逢少年疏俊酒樓同載鸚鵡榼笑賭旗亭句豪氣一
時難壓燒絳蠟只少箇兜娘箏語彈銀甲琴尊趣冷自聽雨
楓橋停雲荔浦萍迹幾離合 鱸鄉去縹緲紅亭白塔煙波
如汎清霄樊川漸老風情減惟有鬢絲禪榻歌互荅問可勝
長安側帽花枝插江鷗倦狎定夢到西湖山家茶熟十里翠
陰市

霓裳中序第一

青邨城隅野桃作花絲盛念遠成賦

灣頭錦浪接彷彿仙源人境絕知否劉郎怨別尙含笑斷籬
吹芳平堞青蕪繡疊似茜裙微步煙月閒門閉一谿自綠破
網薦春鯪淒咽杜鵑啼血歎花底金尊易歇燕支猶泣素
曆彩衷分鸞舞扇飄蜨渡江遲畫楫悄未許尋根問葉殷勤
祝晚來風定莫遣散成雪

金縷曲

雲閒春感

不見西湖柳但濛濛吹來絮影似無還有點點愁心黏不住
卻把愁根種就早池面青萍如繡絮自分飛萍自聚便漂流
終有相逢候身世感幾回首茸城作客飄零久記當初菱
塘散髮藥闌攜手水盼蘭情無限意只在鏡前扇後牘清月

照人依舊埃火鄉關塵夢驚唱刀環何日歸來又離思苦況
無酒

解連環

題宮人斜倚熏籠圖

麝沈金鴨正瑤宮漏靜嫩寒初怯喚侍兒密焙熏籠已弱不
勝扶凍眸微合嬾甚胥支看腕地繡衣斜搭笑瓏鬆鬢彈睡
態未蘇似醉春檻生香更添艾納任羅衾半角紅浪堆壓
賸幾縷心字成灰把寂寞珍珠悄封檀匣撥罷釵蟲颺寶篆
指痕新掐但盈盈夜窗送曙淚凝絳蠟

念奴嬌

題秦梅生參軍青溪看花圖

一蓬煙翠記春江載酒鏡簫平貼錦汎魚油波力輓紅豔霏

微如雪白石祠邊
秦嬖橋畔簫管迎
桃葉家鄉淮海冶
遊堪老秦七
爭柰聽鼓應官六
朝歌舞空對南鴻說
忽地滄桑塵劫換
無限瓊枝銷歇
客淚青衫繁華黃土
夢泣寒塘月花開
花落暗潮猶爲鳴咽

金陵寇亂參軍家屬赴水殉節者二十餘人繪有寒塘泣夢圖

惜秋華

憶雲館賦秋海棠

花也誰憐竟綠章不乞春陰相護倚竹裏寒西風又傷遲暮
無端寄託離根賸一點秋心難訴知否慣含顰弄影滿身涼
露人意更淒楚問絳蠟高燒幾家歌舞獨凭畫闌減卻舊
時嬌嫵冷落芳叢怕尙有紅妝偷妒心苦劇愁苗爲移瑤圃

玲瓏四犯

歲暮客吳未歸用白石越中聞簫鼓感懷韻

月冷戍臺波荒漁市鄉關回首何許采香人不見廢苑空懷
古湘皋甚時再賦蕩離愁畫橋煙浦曉角吟霜晚簾呼酒難
寫別情苦湖山夢尋歸路憶金狨繫馬羅袖當戶玉簫聲
未斷暗送流年去故園心事春鐙裏問誰惜青衫行旅待埽
雪重來約高陽舊侶

絳都春

從西麓體

春衣乍試又錦鳩喚暝冷雨廉纖翠被夢輕湘波人遠思慙
慙碧桃開瘦閒門掩二分紅出重檐是誰清淚燕支渲盡澹
了還添咫尺吳雲萬里正鷺飛草長恨賦江淹海燕自來
青鷺無翼寄詩縑因何酒力渾銷減舊時螺盞愁拈料伊花
葉書殘倦倚繡簾

憶舊游

薄游吳淞旅況蕭然惜別傷春併成悽調

又春帆帶雨茸角吹寒夢遠吳天擬伴梅花住奈征塵點鬢
不似當年翠尊甚時同照落月屋梁邊有多少離情唬鷺不
語江柳搖煙飛仙眇何許怕說與依依歸燕堂前滿目風
光換只青袍草色飄泊誰憐但憑鯉魚潮信珍重遞吟箋想
撲蜨簾櫳愁春未醒人倦眠

渡江雲

江南春已半峭寒似水冷落賣餚簫柳條攀更苦惜別無人
煙雨送征橈停雲望斷牘當年錦字香銷誰會得河梁分手
兩度感萍飄迢迢荒波漁蕩晚火譙門算游蹤難料繞一
帶離愁不斷長短虹橋高樓甚處重簾護正梨花雪壓闌腰

孤夢遠依然酒醒今朝

菩薩蠻

賦牡丹

護花密繫金鈴索錦圍碎翦霞綃薄醉歷不勝情酒闌花未醒
夢中傳彩筆切莫書花葉花底寄相思被他雙燕知

祝英臺近

夢三生香一炷身世悟萍絮青粉牆低鴉背帶愁去乍驚蒜
影鉤簾茶煙颺鬢驚吹落細桃紅雨起還住窺人窈窕窗
前鸚母悄無語寶篆成灰劃徧斷腸句爭知豆蔻詞工鴛鴦
字好暗顛倒十分情緒

又

燕歸梁花覆屋春睡幾時足忽近儂前扇手一雙玉無端繡

譜牘拈瑤笙罷炙早畫閣銀鐙添續
漏聲促最憐半醉輕盈眾裏暗流目作意矜嚴隱約露心曲怎禁蘭帕潛拋蓮鉤
徐斂卻偷傍碩羅裙幅

又

寺東西湖裏外風葉舞青蓋小舫疏簾簫管兩頭載悄看靨
印淩波衣香浣雪似瑤殿謫來塵界最無賴笑伊弄水拏
芳菱角罨羅帶花卸雲鬟隨意一枝戴歸來銀漢初斜金尊
重洗渾不道夜涼如海

又

臉波橫眉黛鎖欲近又拋鞦韆燥罷蘭香斜日漸西過分明屏
曲塘風簾紋織水怨好夢晚蟬催破玉釵墜起來重整鴉
雲芳意忒疏情不點銀釭默倚畫闌坐試看荷葉涼邊豆花

多處笑同數幾星螢火

又

拜星娥招月姊瓜果滿庭際密約輕鸞芳訊夜深遞分來犀
盒香心蛛絲小結怎消得綠窗情味 晚妝洗遙知十二巫
峰不隔錦屏底宿醉猶濃斜倚合歡被生憎舊燕忘歸雛鶯
解事問嬌夢醒來還未

又

鐫銜蟾簫引鳳樓上夜寒重錦被青綾故遣小鬟送誰知衣
桁藏鑑珣窗漏月曾照見秋波微凍 續殘夢曉來簾押低
垂花影屢移動起傍妝臺鸚語暗調弄偷看檀的香銷枕霞
紅印有菱鏡替人矜寵

又

恨千端愁萬點鎮日翠眉斂凝絕檀奴傲骨爲伊貶何當身
化文鴛口銜珠鳳得長傍暖香雲簾薄寒釅新憐病態驚
秋顧影帶圍減暗訴衷腸羅帕淚痕掩那堪梅子生仁桃花
著醋有調笑舌鋒如劍

又

聽離歌催畫槳無計更偎傍緩送行程約共理吳榜便教鵲
鏡終分鸞簫難續也暫慰臨風惆悵試凝望驚心橋過垂
虹一路酒旗颺只恨扁舟不作五湖想奈他巫峽雲歸湘皋
夢遠歎從此紅樓天樣

又

月華圓人面隔彩鳳墮雙翼深鎖寒簧目斷畫屏隙者番藥
鼎沈煙香篝駐火恁夢也影兒難覓苦相憶飛來錦字雲

箋摺罷又重摺天外青鸞密遣遞消息爲言客裏金空愁邊
人瘦且莫醉蘇臺春色

又

晚楓丹叢菊老鄉夢乍縈繞小雨城闌舊約認鴻爪儘饒菰
米炊香鱸魚破玉話不盡酒邊愁抱聽唬鳥怕催鏡裏夫
容一夕帶霜槁相見灣頭又打木蘭權何如覓箇樵青招來
萼綠竟同泛煙波圓渚

垂楊

時屆禁煙江柳搖綠裊回水次黯然言愁

春痕澹沱指赤闌倒水綠深江左隔斷虹橋酒旗無力風前
鍼和煙和雨千絲裏繫不住舊時蘭舸帶斜陽青粉牆西但
算鴉飛墮休問前生絮果是黃染畫衣碧梳鬟朵綺陌人

歸玉鞭曾送斑駁過飄零張緒誰憐我又客裏清明槐火怎
知他獨倚高樓眉暗鎖

望湘人

正疏星案戶千里送秋碧天涼思無限彩楫銀塘璫鐙翠館
尚憶湖亭芳讌酒衰荷心把兜蔭角瑤情深淺盼夜來三五
圓蟾也學舊時人面空把生綃題徧奈朝霞洛浦韞塵誰
見問幾許離愁料有半江難翦蘭雲鏡裏茶煙榻畔都付流
光驚箭便重埽花底香巢已少窺人雛燕

浣谿紗

曉起修蛾著意描嬉春女伴隔鄰招百花生日是今朝藉
草暗投褰幄皺眉檀微視麗牆高妒他垂柳學纖腰

又

簾外雛鬟取次探綠窗幽夢曉猶酣杏花新摘不曾簪
壓鶯綾幄繡佛枕緘麝錦諱宜男齋期忘了月初三

又

玉骨香桃瘦不支懶拈紅豆寫新詞薄寒更柰雨如絲
量藥忍教嘗獨活咒花不許放將離酸辛情味有誰知

又

怕見花陰蝶作團舞衣新覺帶圍寬鏡中紅淚可能瞞
愛撥蘭熏情戀熱戲拋梅子意含酸殢人偏是黛眉攢

羅敷媚

當年人近天涯遠花是春心月是秋心一處相思兩處心
而今人遠天涯近焦了香心斷了琴心兩處相思一處心

永遇樂

秋閨用日湖體

露耿高梧雨鳴清篠垂鐙蘭堂寶鼎香添輕綃扇卻簾卷花
氣涼雙星幽怨雙葉幽夢幾回盼斷紅牆含情久羅衣漸怯
更聽葉墮銀牀芳華易歇流光一去那堪青鏡飛霜麝錦
拋梭冰弦韻軫空引離緒長清砧慵埽曲闌慵倚冷螢閃過
回廊憐嬌女宵深待月尙凝晚妝

鶯啼序

鳳皇山懷古

長雲暗屯樹頂看千峰互抱踞江勢包絡重關艮嶽遙對煙
表翠華去銷金夢歇苔荒輦路棲殘照有何人慨念禾油故
宮憑弔浙臉南來汴水渡馬把朝廷換小湖佳識棋局黃
羅九宮旋見星曜忍偏安臨淮半壁怎挽得銀潢傾倒賸飄

零簫鼓聲中晚春花鳥 旄頭望遠劒血澆涼悵佩環信杳
鶻轉眼碧收天水電影泡影歲月銷沈古愁多少銅山鑄淚
銅駝埋恨珠筵明擁樊樓火已金甌響壓襄城礮龍飛馭絕
誰聞夜柝蝦蟇更逐漏點頻報 空山鳳去幾聞興亡尙劫
灰未埽恁慷慨狂敲如意盼斷西臺野燒寒燐亂煙衰草蒼
涼片石玉鉤斜畔魚燈光冷鴛瓦碎唱秋墳酸咽松風嘯何
堪說與年年雨泣冬青杜鵑盡老

新衡詞卷二終

新蘅詞卷三

錢唐張景祁蘅甫

浣谿紗

聞警

水驛山橋送馬蹏，漫天風絮撲征衣。鷓鴣無奈盡情啼，拜浪江豚猶自舞，徒巢梁燕欲何依。角聲永夜更淒迷。

滿江紅

湖山劫後，避地越東，卽事傷懷，憤然有作。

彈鋏歸來，漫乞食朱門豪冑。君不見英雄未遇，販繒屠狗，文字難求，雲笈護錢刀，易逐風車走。問渭川千畝橘，千株吾何有。也莫羨懸河口也，莫歎懸椎手。儘忘機狎徧，漚朋鷺友。題柱馬卿游覽倦，登樓王粲飄零久。倚酒酣呵壁，問青天。

知否

又

如此湖山忽輦鼓從天而下看是處豐林走象荒原刷馬血
飲黃麋生氣盡悲銜朱鳥忠魂化指長濠一帶跨錢江何爲
者 刀鞬吼龍戰野篝火起狐鳴社歎東南文物而今休也
鉛水暗飄金狄淚將星孰副雲臺畫問穹碑何日樹燕然凋
弓挂

水調歌頭

甲子春仲杭垣初復余自暨陽旋里入城則埜煙
蕭條青蕪彌望哀筵四起不勝淒黯少陵城春草
木深一語髣髴似之逾年遇王君研香於湖上酒
壚話舊悲喜交作攜有西湖歸權圖索題因譜此

閔振笛長吟不啻燕市之擊筑也

自昔釣游地舉目似新亭故園喬木何在豪士厭言兵休問
畫船簫鼓賸有荒城鶯粟哀雁兩三聲灑盡劍南淚老去樂
承平生長兵閒老
太平劍南句十年夢攜手處倍心驚讀書不謁金馬
歌酒換浮名誰載扁舟桃葉空折蘇隄楊柳沈醉幾時醒詞
客爲多感來賦晚山青

多麗

紅羊厯劫重至西湖觸目興悲不勝細柳新蒲之
感用蛻巖韻以寄慨

戍烽青江城十里空冥看依然斜陽隴首雙峰倒插瑤屏繡
旗開長壕度馬銅輦去廢苑棲螢鳳嶺雲荒龍天劫換百年
喬木總凋零任水寺晨鐘敲徹春夢幾人醒爭知我馮高痛

飲淚灑新亭 憶當初游人似海畫船盡入西泠扇羅拋輕
兒蛟蜺釵梁側斜掠蜻蜒暗拾花鈿徐催寶騎滿湖簫鼓醉
中聽回首舊游何處華鬢已星星閒愁重一般付與月微煙
汀

一萼紅

梅泉弔月圖爲朱淥卿悼亡作

悄開門正梨雲滿地搖漾月黃昏井榦苔封鏡奩塵蝕環佩
猶喚歸魂記曾共巡簷索笑奈疏疏雪片墮芳尊院靜鐙孤
天寒袖薄夢醒香溫怕倚尋春舊檻歎簾櫳似水鏡印空
存螺筆拈愁犀株鎮怯寂寞往事休論問何處迷藏難捉只
滿庭香霧澹無痕又踏楊花謝橋寬過前村

減蘭

湖中賦采蓮女

蘭橈輕舉蕩入花叢無覓處瘦影嫋嫋菱鏡當頭嬾自看
青房試擘苦似儂心誰解惜莫打鴛鴦多恐飛來不是雙

念奴嬌

感舊和研香韻

烏噓城角望天涯不見舊時芳草一自錦帆飛極浦碧漢秋
期空杳鬢影殘蟬琴心哀雁併入淒涼調霜華塵鏡十年情
事誰曉 何況海燕飄零雕梁成土風雨傷羈抱畫裏谿山
無恙在漠漠冷葦疏蓼候館鐙昏成樓笳動夢度煙江悄嬋
如何許玉蟾千里同照

清平樂

清霜墮曉菊綴金鈴小冷豔一叢疏亦好只怕芙蓉先老

重簾一半輕遮箇人憔悴天涯輸與西園胡蝶伶俜獨抱秋
花

鵲橋仙

一鉤新月數聲新雁人在小樓前後霜階如水夜如年漫數
偏花宮蓮漏 吟梅才思牽蘿心事說與侍兒知否幾家珠
翠照長檠獨耐此天寒羅袖

疏影

李香華貳尹以鄧尉探梅行卷索句用白石韻

林巒凍玉有精藍迴峙巖際雲宿薄暝香來薄醉人來行行
自杖叩竹百千小影梅花海早夢到谿橋南北記者番蠟屐
支砌爛采滿山黃獨 踏徧橫斜萬點半簾印澹月吹破煙
綠禪隱如仙吏隱如仙合伴青鐙吟屋宦情不比詩情好總

付與笛波幽曲笑臥游我亦尋春飽看冷香圖幅

木蘭花慢

楚天秋萬里眇離思託征鴻自蘭苑人歸玉簫夢遠佳約雲
空西風暗吹斷柳是來時煙雨繫吟篷麝帕猶絨醉墨蠟鐙
不照唳紅 懼悰記入舊芳叢小燕語簾櫳有香貼玳合花
分寶髻心事瓊瓏芙蓉又凋素錦柰文園賦筆漸疏慵攜得
船頭翠楫鈿車何日重逢

百字令

吳仲英司馬之官羊城索題月明千里故人來圖
兼誌別感

重重嶺樹驀當空埽盡瘴雲千疊紫綺烏紗人半醉門外誰
停車轍孫楚樓高桓伊笛冷似惜河梁別霜關回首馬蹏寒

路如鐵 憑問孤鶴南飛不逢驛使忍把江梅折安得松風
亭下坐良夜清尊同說木客吟詩珠孃盪漿袖出西湖月羅
浮何許玉京天半奇絕

減蘭

夢中得句云小幌分香翦建蘭意似夏閨醒而足

成四詠

簾橫新竹起傍蕉窗生暗綠汗粉輕融轉怯紗幮一縷風

蟬雲墮領犀釵雙開衣不整曉露初乾小幌分香翦建蘭曉起

又

荷心酒輓一餉支頤渾欲倦樹影移階涼入華胥夢裏來

紗幮未閉扶上方藤剛半倚道是惺忪紈扇無聲落袖中午睡

又

羅襟初掩收盡餘蒸還拭臉綠玉橫枝回向冰匳理鬢絲
殘妝半脫故轉銀屏教背燭池上風微一縷新蟾見畫衣晚浴

又

銚飄隔院絡緯言愁宵苦短竹几伶俜露溼牽牛小朵青

明河漸落仰視寥空聞唳鶴涼意如潮莫向閒庭弄碧簫夜坐

水調歌頭

題許秋蘆外兄秋蘆汎月卷子

水月大圓鏡風葉一扁舟谿光十丈如洗坐我碧天秋宛似
潯陽送客又似後游赤壁浩蕩古今愁瑟瑟荻花裏白了幾
人頭披圖畫感鴻雪恨悠悠蓬萊兩度清淺詩卷此長留
一自成連歸去杳矣琴弦不鼓吾道付滄洲中有魏文微伯
題句辛酉之變

閨門殉節

海內識君者猶有舊沙鷗

望海潮

秋日江樓觀潮

樓憑疊雪塘臨捍海錢江雄占神州鐵柱駕鼇銀山驟馬雙
壘森束中流石鏡照垂旒挽水犀强弩往事都休落日樟亭
萬家煙雨洗清秋風前齊卷簾鉤聽回颿舊曲狎浪新謳
空巷闌妝重門啟鑰月中好景誰留腕底怒濤收有梁園健
筆笑傲滄洲願與吳兒逐隊散髮弄扁舟

臺城路

和家仲甫丈山塘春泛兼敘今昔之感

戍塵埽盡蘇臺路蒼波自驚重照廢苑鳥嘯荒祠鷺宿不見
桃花紅笑香谿夢好慣商略梅邊緩移吟櫂寂寞而今一川
煙雨暗春草尊前何限舊感攸肱歌小海誰是同調畫戟

英游瓊簫俊約尙憶承平年少斜陽換了怕綠到梧宮易成
秋招莫負西湖柳隄鶯未老

尊人蘭渚侍郎外舅韓三橋中丞先後撫吳丈皆隨侍

摸魚子

題沈蘭沅先生柳陰垂釣圖

漫投竿越谿深處苔磯長繫煙艇白蘋風細千絲卷點破碧
天清鏡漁唱定看是處人家綠到柴門靜搖晴簑暝指短笛
涼邊輕蓑雨外秋在鷺鷥頂垂綸久依約蒼髯照影柔條
縈帶文荇澄波百丈游魴鯉心與水流無競塵夢醒笑知我
知魚應悟濠梁境胸中萬頃待濯足滄溟珊瑚樹拂說與釣
鰲興

時余將航海入都

國香慢

慰農薛夫子齋中盆蘭結子二枚命之曰蘭孫

露葉天斜忽春風翦髮幻出雙鴉前因證來香祖譜牒清華
知否森森抱玉謝庭畔好夢曾誇相思解瓊佩只種芳蓀不
種愁芳 夜鐙明一點想芬傳硯几韻入窗紗楚雲天遠難
問帝子誰家合付鷗波翠墨更添取慈竹陰遮秋心澹無語
且住瑤琴爲卜瑤花

古香慢

前題

玉妃送喜香祖貽芬生意盈抱望極王孫綠到幾叢芳草橫
御弄冰絃只一片湘雲暗繞喚花魂未醒絮果再參空惜秋
老 問九畹滋培多少公子無言佳夢曾兆穉葉亭亭帶露
最憐嬌小采徧玉墀春是雙萼連枝更好寄相思又何處楚
江煙渺

秋宵吟

客鬢驚秋詩燈眷夢借抒古意用寫新愁

按白石原譜協

四聲

暝螢飛病鶴語畫檻香銷蘭炬流光換漸蔓剪瓜塋翠荒蒨
渚掩羅幃理繡杼皓月娟娟當戶銷凝久正倦織流黃亂
拋金縷漢淺河清那更覓吹簫舊侶露寒銖袂霧溼雲鬢
懶對鏡鸞舞屏角蛛絲吐鈿合重開心事暗數最無端夢醒
西窗蕉葉桐葉碎夜雨

醉江月

秋夜湖心亭坐月歸宿蘇公祠

萬峰如墨忽鱗雲淨洗一珠高揭放眼空明無障礙把酒問
天時節獨鶴驚秋長魚舞影四面冰壺澈紅闌在水玉如涼

透羅韞 堪笑看雨開門菰蒲響處幾點漁燈滅我愛乘風
歸去好戀此瓊樓瑤闕薦菊泉寒焚香閣靜人境都清絕十
年一夢舊時鷗鷺能說

翠樓吟

題天寒倚竹圖

剗韞塵生循廊路曲嬋娟小影同瘦瀟湘清夢遠問日暮靈
修來否羅衣冰透歎辛苦寒閨牽蘿難就黃昏後冷香吹滿
月痕微漏 垂手小立風前自賣珠人去綠窗孤守平安千
个字早寫入雙蛾春皺飄零鴛袖怕團扇乘鸞玉容非舊凝
情久蜜梅花底倚闌還又

臨江仙

不用明珠量斛畫圖買盡娉婷仙風吹下許飛瓊知他歌

扇底何處坐調笙 暮雨門前車似水
驚鴻瞥見還驚來時
如夢去時醒 蓬山原不隔惆悵是雲屏

齊天樂

燕臺春感

曲屏不卷流蘇影 風前護他輕燕
釵朵教安 鞦韆塵代拂 贏得
花枝當面 爐熏炷淺 任柝轉銅街馬
馱霜片 酒醒天涯 絲窗
鶯語早 曉徧 黃金空負市駿玉鞭
歸去 好情思何限 倦笛
飄梅征衫 點絮人是先期 秋雁離
觴自餞 歎過了 櫻桃不成
芳讌 且駐香車 柳絲和淚翦

一枝春

落梅次張公東同年韻

薄暝成煙 黯銷魂 戍角黃昏催警
尋春路迴步繞半谿香冷

清尊倦洗賸簾外瘦蟾鏡影曾記否江驛霜空怕有舊情難
贈 經年墜歡重省又鱗鱗萬點蒼苔低映青禽怨晚那管
妒花人病仙雲暗墜料吹滿壽陽宮鏡休更換笛裏東風故
園夢醒

又

再和前韻

索笑簷空晚風尖聽徹金鈴敲警霜天夜迴半鳴凍雲吹冷
橫斜態好暗搖碎畫簾燈影憑喚起舞雪瑤妃舊日佩環誰
贈 芳期那堪回省記霞綃細翦冰鈿圓映春心太苦釀了
玉容嬌病重門靜掩料無意試妝鸞鏡空自惜孤鶴苔階抱
香未醒

買陂塘

城東皋園梅花盛開同人請薛慰農先生作文酒
之會時先生將移席金陵因綴卮詞以代驪唱

埽西園半林殘雪梅邊來款珠履習池一醉風流盡鴻爪十
年空寄尊再洗歎鶴驚黃樓此樂今誰繼蟠龍故里縱邀笛
間歌圓鐙說劍襟上酒痕記 明湖畔問字精廬暫啟春陰
猶眷桃李鬢絲扇影渾疑夢不似舊時情味詩卷裏早帶得
新愁六代江山氣天涯倦矣待洛社人來洞霄吏隱魚鳥爲
公喜

慶宮春

扇引嬌雲簾垂寶篆日華猶自曛曉錦幄迷春瓊臺殢酒厭
聞花外疏鐘曉山如黛早偷畫蛾眉翠峰雛鴛何事不怕動
鈴蹴損香紅 別來小苑旋空冷落雕鞍誰繫青驄墜絮成

塵游絲罥網惱人偏是東風鳳城煙柳暗添鎖離愁萬重哀

鵲唳血知否素秋還發芙蓉

前後第十句寄開云依約遠峰
簾卷翠樓絕妙詞選如此今從

之詞律云翠
應作平誤矣

夢芙蓉

題許邁孫醫夢庵填詞圖

秋心何太冷倩冰荷暗炙一簾詩影隔紗煙語佳約誤煎茗

穗紅扶未定梨雲空際吹暝一縷飛來怕蕉窗界住重剔玉

釭等猶憶文疏漏靜背燭無言雨浥薑花病謝郎顚顚羞

對舊鸞鏡薄衾慵再整判教沈醉難醒欲待尋伊又瑤笙喚

徹斜月眷緜嶺

君詞初名
緜山笙譜

西子妝

春盡日過花神廟遺址

墜粉成塵流香在水寂寂羣芳誰主一春夢雨送韶華黯銷
凝倦簫殘鼓封姨漫妒那更有仙旂暗護湖前游問瑤臺十
二佩環何許沙隄路拾翠人來無計留春住鶴林花事杳
如煙忍重話玉冠珠屨鈿車自去但一片斜陽無語儘沈吟
掠過西山翠羽

金縷曲

弔史閣部墓

碧盡嘯鵲血喚歸魂梅花古嶺大江橫月天意已教明社屋
攀到龍顙欲絕歎瓊樹南朝歌徹燕子春銓昏夢裏聽長淮
金鼓聲嗚咽軍國事向誰說飄零半壁殘陽滅想家書十
行草罷早判長訣四鎮雲屯蝸角鬪獨有忠肝似鐵算柴市
千秋比節莫道衣冠遺蛻杳看輝煌

天藻鐫苔碣扶正氣表奇烈

純廟有御製弔閣部詩廷臣皆有和章

醉江月

辛酉十一月粵逆再圍杭州劉拙庵司馬奉大府
檄赴三衢乞援中途聞杭城陷僕園星散徒步至
龍游已偏歲除雪深四五尺百里外無人迹蹠蹠
沙渾中瀕於危者數矣亂定後繪雪離行旅圖以
紀實時余亦倉皇北走開關戎馬閒困厄有同情
也

城懸大末甚芒屨蹢躅亂灘危雪十里戍臺行迹斷何處大
旗明滅津鼓無聲郵籤不報白了青山骨悲笳漸起朔風一
夜吹裂回首虜馬橫江封狼入市契箭奔銀鵲那得杯盤
供餞歲萬戶同傷離袂衣棱生冰刀光射燭咫尺軍書絕披

圖長歎元城肝膽如鐵

踏莎行

殘雨虹收輕車雷動回鞭又逐芳塵去半區秋水翦吳淞柳
絲絆得蘭橈住 壁月當簾仙雲墮枕雙蕖笑指釭花語明
朝挂席海茫茫青山一髮人何處

浣谿紗

金轎車塵似水馳鬧蛾爭唱落梅詞東風又到海棠枝錦
幄香溫花事早銅街月滿漏聲遲鳳城最好冶春時

又

起卷湘簾舞燕斜濛濛絲雨沁蟬紗教郎且住試新茶江
上自生黃竹子門前空落碧桃花鷓鴣啼老不還家

蝶戀花

卷地麴塵馱細馬，曉損黃鸝古道垂楊下。
挾彈歸來，珠勒卸羅衣，笑拂彫弓靶。
紅燭如山，蓮漏夜十斛蒲桃，抵得梁州價來日青門花事，謝不辭醉倒茶蘼架。

又

坐擁猊爐香篆綠，簾幕無風，煖錦藏燕玉。
手擘霜柑，蛾黛蹙酸辛，要識儂心曲。
悄拔金釵，彈樺燭放走狸奴，壓損湘裙幅。
忘卻三更，虬箭促文簽，那不收棋局。

又

掌上回身輕似葉，小萼愁蛾也學雙棲，曉好夢坐銷衾半疊。
夜窗點盡紅爐雪，擣麝花房香作屑，靈藥難偷誰護飛龍骨。
擘鏡自憐，嬌病怯青霜，彈上芙蓉月。

又

豆蔻湯溫簾戶悄密綰蘭雲重剔銀釭照壓枕冰蓮釵朵小
夢回抵似江南好暮雨膏騰春事了窗外雛鶯也作嘯鵲
報腸斷斑驂歸去早炎風五月黃塵道施中山末利詞小蓮
冰潔京師唐花二月

盛已

木蘭花慢

吳中號佳麗之地擅歌舞之場重簾障春月眷珠
戶雙漿蕩玉花迎璧人脂薌媚波靨印愁草幫屣
所集觴詠方滋沈君子梅綺懷盪句瓊想入骨青
門繫馬鞭值千金紫曲調鴛珠收一串則有茜桃
麗質靈芸妙姿鮫梭織衣麝墨緘錦芳襟蘭鬱豆
蔻詞工曼睪波回玫瑰笑淺花飛釧動溶溶翠帳
之春茶熟香溫昵昵綠窗之語羊鐙夕灑鵲鏡晨

潮驅環之約早堅斛珠之量尙阻琴心海角忽譜

水仙

子梅時
寓津門

扇影章臺未歸京兆九張機上織錦

字而誰傳七寶車前望香塵其若夢玳梁燕去莫

問盧家簫臺鳳吟獨懷秦女繪簪花圖一幀索題

描成寶曆猶妒芙蓉寫到羅裙也憐芳草睂邊傳

恨尙期杜牧重來袖角題名願博憶孌一笑

枕霞痕未褪對明鏡理晨妝愛鋪朵微開瓊枝新翦濃鬢釵

光商量髻心近遠轉橫波背後自形相入手犀梳乍放拂肩

鸞袖猶颺 蘭房曾記捉迷藏帳角溜餘香想玉搔暗墮蟬

雲偷攏幾度回腸難忘漢皋佩解又烏噓月落冷吳江留得

驚鴻豔影算來不隔紅牆

采桑子

鬱金堂上留犁酒舞扇香招蠟苳紅銷春在高樓豆蔻梢
灣頭荷葉青銅爛又喚歸橈殘柳千條鴨語西風第四橋

摸魚兒

辛未初冬朱子慕庵與同人游西谿歸以詩索和
憶十年前與魏丈滋伯楊君晚嵐襍被諮禪信宿
交蘆庵中霜花始腴明月作畫呼鐙煮酒觀董宗
伯陳睂公諸老墨蹟情景歷歷在目今則溪山如
故黃墟已非追念舊游車過腹痛泚筆賦此以當
山陽鄰笛可乎

繞秦亭萬峰屏列幽谿環碧如帶年時慣作橫塘夢那羨五
湖蝦菜雙槳快記雪壓秋蓬荻火明寒瀨霜菰自采正酒熟
前邨鱸香小市風月不須買 平橋路三兩漁莊未改釣游

吟侶誰在輞川詩思都銷歇愁殺水情雲態歌歛乃只斜日
歸船破網當門曬黃蘆半矮問何處茅庵幾分竹徑清磬出
塵外

西谿蘭若如林備載梵隱志修篁繚曲飛澗潺湲
展園所經迴絕人境而以交蘆秋雪兩庵爲尤勝

瑤花

蕭山王桂川以家藏端谿三十六硯索題同研香
作

冰匳翠活吹徧楊花把琳腴輕拂谿光淨硯都洗出一品洞
天清絕縈青荇藻儘深護兜央重疊倚水簾寫入鱗箋三十
六陂煙月 船窗暗數歸裝有荔殼籠霞蕉尾涵雪鵝池試
浣只合伴百種蘭亭珍帖蓮膚細琢問可許紫雲同乞待覩
他幾朵瑤峰韻事米家重說

李後主硯山長尺餘前聳三十
六峯後爲米老所得見避暑餘

鈔

楚峰青

自度曲

無限離情正春寒似水飛絮滿江城倦倚繡鞍重扶宿醉殘
夢猶繞雲屏蘭露重柳煙輕問此去天涯知幾程最銷魂處
珠簾坐月杏院吹笙盈盈雅澹妝成有按香密意織錦深
盟鬢彈畫蟬歌蘼金縷花外應惱流鶯芳草遠暮雲停忍更
憶陽關腸斷聲容相見愁顰兩點惟有楚峰青

鬪紅

月夜西冷觀荷自度此曲以洞簫按之聲律諧婉
因采白石詞意名其調

畫橋側盪煙水半湖秋思涵碧月溶波灩花深霧細晃漾繁
鐙千色水窗荷氣入早涼沁綺香瑤席玉宇斂開銀塘粉墮

仙掌承盤露華白 簾隙蟬紗暈溼對采扇傳歌銖袂橫遂
酒鱗微動蘋絲暗度吹起嬌雲無力開紅圍四壁怕洛浦韞
塵難覓更堪鏡裏青霜偷換那時重憶

新舊詞卷三終